

Samostalna zastupnica - Elza Gaković

Sarajevo, 07.01.2026. godine

ZA:

Vlada Kantona Sarajevo

U skladu sa članom 106. i 213. Poslovnika o Skupštine Kantona Sarajevo, dostavljam:

INICIJATIVA

Na osnovu Poslovnika Skupštine Kantona Sarajevo, Zakona o budžetima u Federaciji Bosne i Hercegovine, te u okviru zastupničkih ovlaštenja podnosim inicijativu,

Za hitni rebalans Budžeta Kantona Sarajevo radi nabavke mehanizacije za čišćenje snijega i održavanje komunalne higijene Kantona Sarajevo.

OBRAZLOŽENJE

Podnosim inicijativu da Skupština Kantona Sarajevo zaduži Vladu Kantona Sarajevo da hitno pristupi izradi i upućivanju rebalansa Budžeta Kantona Sarajevo, s ciljem osiguranja finansijskih sredstava za nabavku savremene mehanizacije za čišćenje snijega i održavanje komunalne higijene na području Kantona Sarajevo.

Razlozi za pokretanje inicijative:

U proteklom periodu, naročito tokom zimskih mjeseci, evidentirani su ozbiljni problemi u održavanju prohodnosti saobraćajnica, trotoara, prilaza javnim ustanovama i naseljima, kao i u održavanju osnovne komunalne higijene.

Postojeći kapaciteti javnih komunalnih preduzeća, posebno u pogledu raspoložive mehanizacije, nisu dostatni za efikasan odgovor na snježne padavine, ekstremne vremenske uslove i povećane potrebe održavanja javnih površina. Ovakvo stanje dovodi do ugrožavanja sigurnosti građana, djece, otežanog funkcionisanja hitnih, zdravstvenih i komunalnih službi, dodatnih i neplaniranih troškova kroz angažman privatnih izvođača, nezadovoljstva građana i narušavanja slike glavnog grada Bosne i Hercegovine.

Imajući u vidu učestalost ekstremnih vremenskih prilika, klimatske promjene i rastuće potrebe urbanog prostora, jasno je da se ovaj problem ne može rješavati ad hoc mjerama, već isključivo sistemskim i dugoročnim pristupom.

Zakon o budžetima u Federaciji Bosne i Hercegovine omogućava izmjene i dopune budžeta u slučaju nepredviđenih okolnosti i potrebe osiguranja javnog interesa. Održavanje komunalne infrastrukture, sigurnost saobraćaja i zaštita zdravlja građana nesporno predstavljaju javni interes od posebnog značaja.

Prijedlog konkretnih mjera:

Predlažem da se rebalansom Budžeta Kantona Sarajevo osiguraju namjenska sredstva za:

nabavku snježnih plugova i posipača soli,

multifunkcionalnih komunalnih vozila za zimsko i ljetno održavanje,

manjih specijaliziranih mašina za čišćenje trotoara i pješačkih zona,

mehanizacije za održavanje komunalne higijene tokom čitave godine,

nabavku namjenskih vozila za dvolinijski odvoz otpada.

Nabavljena mehanizacija treba biti u vlasništvu KJKP "RAD", čime bi se dugoročno smanjili troškovi, povećala operativna spremnost i smanjila zavisnost od drugih izvođača.

S obzirom na ozbiljnost i hitnost situacije, predlažem da Skupština Kantona Sarajevo ovu inicijativu razmotri po hitnom postupku, te da zaduži Vladu Kantona Sarajevo da u što kraćem roku predloži rebalans Budžeta Kantona Sarajevo u skladu s navedenim argumentima kako bi uspostavilo funkcionisanje KJKP "RAD" u skladu sa realnim zahtjevima i potrebama života u Kantonu Sarajevo.